

編號 1 號

【潑波籽歲月】李宜諭原作

六月个南臺灣，莊下个溝脣、人家个屋前屋背，總會看著青青黃黃、細細粒、打歸樹个潑波籽。又到斫潑波籽、擇潑波籽、撚潑波籽个時節，該係記憶肚个好味瑞。

頭擺，阿奶在楊寮下田坵脣隈溝个所在，種三頭潑波籽樹。逐年五六月，潑波籽好摘咧，寮日个打早，阿爸斯會用奧多拜載緊吾等恁多姊妹，奧多拜个後架過拖一臺里阿卡<sup>1</sup>，去楊寮下斫潑波籽。去到楊寮下，遠遠斯看著，阿爹既經擎核刀嫲在該斫樹桠咧，一桠一桠大大个樹桠斫落來，阿爸斯同大樹桠拖拖共下，過同吊核潑波籽个部分，一細桠一細桠剝落來，吾等細孖嘍斯搵手同潑波籽桠裝入布袋肚。尾項，阿爸會同一布袋一布袋个潑波籽，上到里阿卡項載轉屋家。

轉到屋家，阿姆既經同一隻大腳盆放在天井脣咧。潑波籽倒入腳盆肚過舀滲水，大家斯圍核腳盆，坐在矮楯頭項，開始擇潑波籽。因為剝撇蒂頭个潑波籽會有液液个乳，所以，兩隻手愛浸在水竇，一粒一粒擇。擇好个潑波籽放在細盆肚，無愛个梗斯擲

在大腳盆脣。兩隻手在水項浸久咧，手指斯會皺皮皺皮，當像老人家个手，有一屑得人驚。

因為愛一細桠一細桠緊搨、緊尋、緊擇，下把會昏嗲昏嗲<sup>2</sup>，毋多知同梗擲在細盆肚，潑波籽嘎抨在盆外背，分醒咧正又遽遽同擇好个潑波籽拈轉細盆項，正經係加無閒个。

滲滲一腳盆个潑波籽差毋多愛擇成點鐘。阿奶會同擇好个潑波籽倒入大鑊頭肚，架樵燒火，還不時愛去罇，正毋會結爌。潑波籽煮熟咧，還燒燒斯愛舀入碗項攪鹽去搵，鹽攪較多一屑斯較好成砵。斯恁泥燒手燒腳<sup>3</sup>無閒一日，一砵一砵个潑波子總算做好咧。

潑波籽加蒜頭煎去赤赤一等好食，成半下摻雞卵落去煎又還較香，係細人个盡愛。吾爸為著愛拐吾等細人食飯，斯教吾等一細砵潑波籽傍一大口飯，飯吞落去咧，用當門牙咬核潑波籽个籽，過用舌嫲西出來<sup>4</sup>，看麼人个潑波籽籽射盡遠，所以，逐餐食飯都緊搞緊食、嘻嘻嘩嘩。

該站擇潑波籽、西潑波籽籽个日，也係係永遠記在心肝肚个幸福歲月。

<sup>2</sup> 昏嗲昏嗲：音 funˋ deˋ funˋ deˋ；頭腦不清楚。

<sup>3</sup> 燒手燒腳：音 sheu+ shiuˋ lugˋ giogˋ；比喻操作燙手的工作。

<sup>4</sup> 西出來：音 teˋ chudˋ loiˋ；吐舌或用舌頭將口中之物剔出來。

<sup>1</sup> 里阿卡：音 li+ a+ gaˋ；外來語，兩輪拖車，可以人力拉動或連結於車輛後方。

編號 2 號

【該下】林伯殷原作

「投手擲出球」、「打擊者用力一拵，球飛向一壘！」、「哦！一壘手跔落去接殺，黏時用腳躡核壘包，一壘跑者赴毋掣走轉一壘，再見雙殺！」「臺灣贏咧！臺灣贏咧！臺灣得著世界棒球十二強比賽冠軍！臺灣冠軍！臺灣冠軍！……」電視主播喊到哨聲<sup>1</sup>咧。該下，球場肚个臺灣選手噉咧、教練噉咧、現場同電視頭前个球迷也噉咧。該下，臺灣人十分感動，乜當風神，因為，這陣選手實現臺灣人打野球个百年夢想，完成臺灣人當望，毋過毋識望著个心願。

日頭下，一陣晒都烏刻刻个球員在球場練球，聽教練个指導同示範，認真學習各種基本動作。練了一擺又一擺，都算汗流脈落，衫褲溼撇又燥、燥了又溼，乜無停途一下。恁泥煞猛練習，斯係為著在比賽个時節使得有好个表現、好个成績。臺灣對少棒到成人棒球，各地各級个選手做下係一路打拵上來个真材實料。好得恁多年，臺灣打野球个環境有改善咧，培養出恁多有名个球員，正有好點出恁多个人才，組出恁勻線个球隊來代表臺灣出

戰。因致，若係有大家个長期投入，正有打贏比賽該下个歡喜、感動同目汁。

除撇長期个打拵，乜愛有當多頭擺个該下，正會有包尾光榮个該下。像：嘉義農林野球隊得到甲子園亞軍、紅葉少棒隊、三級棒球隊去美國比賽得冠軍、臺灣職業棒球開始、臺灣球員加入大聯盟比賽等等。這一擺又一擺个該下，分大家一到又一到來關心野球比賽，這種熱情直直在恁等个心肝肚，毋識烏撇，臺灣个棒球歷史正有機會寫到拿十二強冠軍該下。當然，該下還畀結束，因為，野球比賽還係會繼續參加落去，相信還有當多感動人个該下會續落去。

臺灣人有好風神、有好分人安腦該下，表示大家識打拵過咧，像：棒球、羽毛球、晶片製造、全民健保這兜，斯係大家打拵个結果；貶過來講，大家有打拵，臺灣人正有風神、分人安腦个該下。

<sup>1</sup> 哨聲：音 sau+ shang+；聲音沙啞或失聲。

編號 3 號

【貓鬧鐘】徐姿華原作

因致驚會睡過邊，佢自細斯有設鬧鐘个習慣，讀書時節會用鬧鐘，這下會用手機。愛睡目進前先定好時間，時間一到，鬧鐘个音樂斯會響起，同宕睡个佢對甜甜个夢肚喊醒、對燒暖个被竇拉出來。分鬧鐘吵醒雖然真毋甘願，也總比赴毋著上課、上班，分先生、頭家刻臭頭較贏。

這恁久，佢過多加一個鬧鐘。這鬧鐘當生趣，有幾下種方式喊人跣床，分這鬧鐘喊醒，心肝肚毋單淨毋會慍悴，顛倒會目笑鼻笑，歡喜甘願跳落眠床，還會有歸日个好心情呢！係麼个樣个鬧鐘恁好用？哪位有好買啊？這鬧鐘孤門獨市、無哪好買，單淨替佢服務忒等，這斯係吾个貓鬧鐘——咪咪。

普通時，手機个鬧鐘響，佢若還繼續忍床<sup>1</sup>，佢斯會喵喵滾緊喊，抑係用厥該粗鱗鱗个舌嫵舐吾手，提醒佢好跣咧；佢也會同厥細細个頭那鑽入吾个手巴掌項，使妮討愛掌頭。恁泥得人惜个動作，麼人還睡得落覺？黏時斯跋跣來，認真同佢掌頭、掌圓身，掌都時間及及咧正停手。

有一日朝脣，時間到咧吾手機嘎無響，佢還睡去屎肫孔孔。迷迷糊糊當中試著有麼个在揪吾褲，目睡摸些嘎看著咪咪用牙齒嚙緊吾褲揪下、揪下，放撇下又過來嚙。佢當細義無嚙著吾腳髁，毋過，也同佢喊醒咧。好得佢，該日上班正無慢到。

還有一擺，禮拜六毋使上班，佢挑挑無設鬧鐘，發夢當在食大餐，結果，肚屎、胸脯試著分麼个揶核，感覺重重、疾疾，目珠一擘啊開，同咪咪四目相對，五公斤个佢企在吾肚屎面，低頭看佢，當像在問講：「人，你毋使上班喲？還毋遽遽跣床？」哀哉～這貓鬧鐘實在還心色哪！等佢跣床了，佢斯會坐緊看佢出出入入、無閒準備上班。等佢愛出門咧，佢正尾翹高高行過來，在吾腳脣徑兩下、喵兩聲，親像係同佢講再會。

這咪咪，本旦瘦夾夾在公園流浪，來吾屋家三年，佢對驚人到親人，到這下黏人又錫人，佢又乖又即靈，實在分人惜入心。若係你也有一隻恁得人惜个貓，日日做若鬧鐘，有幾幸福你斯知哪！

<sup>1</sup> 忍床：音 ngiun+ congˋ；賴床。

編號 4 號

【好得，雨落過咧】彭瑞珠原作

月光，在高高个天頂，分薄薄、火灰柑个雲遮核；因在雲背个月光，懶懶、毋想停動。闊闊、無麼个風浪个海面，一片恬靜，單淨，遠遠、天邊該<sup>1</sup>，兩三點漁船个電火，跔緊無麼个想徙步个時間瞞啊瞞。

海面右側角个烏暗肚，一痕山蟻公恁大个鑽石碎，對海天之間順順遊過來。「係麼个船呢？厥電火，仰恁幼？」「哪係幼，係幾下排電火層緊，有錢人个船哦！」「毋係漁船，係大船呢！」該係貨輪，抑係風力發電个工程船呢？做下都毋像。佢用二十節<sup>2</sup>个速度，遊啊遊，遊到遠遠个頭前中央，分吾等看真。

「一、二、三、四……」「船面，盡少有五排電火……，啊，係載人去寮个郵輪啦！」「佢愛下南抑係上北？駛去哪個國家呢？」遽遽，掄出手機，毋使過揣咧！

根據阿古哥<sup>3</sup>个地圖，臺灣盡北个燈塔——富貴角，在左手片較過去一屑；正前方，該係……，啊，愛去日本啦！船，斯照阿

古哥講个「北方」，直直駛、駛到毋見撇，留分吾等去「回想」。回想，千外個人共船遶寮个快樂，上擺，吾等也識定過該船項盡高棧个間房，照這下个時間來看，係食宵夜……。

玄玄風，一隻烏影對左手片掬啊過<sup>4</sup>，實在還急性！順緊佢掬出來个方向，路燈照核个圍欄角，一個五彩个蜚蜚絲圓網，厥脣項，分該隻蝶撞爛一大空。一對金頭、金頭个蜚蜚子哀，慢板慢板、恬恬在網脣看，顛倒係吾等替佢道嘆。

唉，看一暗晡灰灰暗暗个海面，好駛車轉去睡目咧！行到車脣正發現，青青个草坪軟松軟松<sup>5</sup>，草坪面頂係靚靚、嫩嫩个細黃花。係啊，雨落過咧，薄薄个雲開始散撇，歸個天頂……都係微細个星光；天光日，會係好天時啊！

好得，雨落過咧，蜚蜚阿母毋使過涿雨整網，還有柔柔个月光、靚靚个花坪同佢做伴；吾等也吹緊五月涼風、看核海景，餵好毋會少蚊咧。

<sup>1</sup> 該：音 gai`；那個地方、那裡。

<sup>2</sup> 節：音 zied`；此指速率單位，定義為每小時海里數。

<sup>3</sup> 阿古哥：音 a+ gu^ go+；阿古哥，此指 Google。

<sup>4</sup> 掬啊過：音 sio` a+ go`；以極快的速度經過。

<sup>5</sup> 軟松軟松：音 ngion+ sim` ngion+ sim`；柔軟彈動的樣子。

編號 5 號

【老樟樹个春天】曾俊鑾原作

老樟樹企在路脢毋知幾多年咧，厥个樹身愛三個大人正圍得跣來，歲月在厥圓身留著永久个影跡。像舊年熱天做風搓該滿，當多樹桎分風打斷截；底下个泥肉乜分水打走，跂跂糾糾<sup>1</sup>个樹根看現現。該央時，佢分大風吹到拗腰，硬硬會轉撇。前一站，又堵著盡冷个寒天，三日風，三日霜，在本底結痢个所在切開還較深个空口。

等盡尾一擺寒流過詐，火蛇<sup>2</sup>緊曠，暗雷<sup>3</sup>響，老樟樹略略感受著對遠方傳過來沉沉个鼓聲，該係春天在地泥下睡醒个信號。佢先擘哈，續緊伸一下腰骨，跔核風个節奏發出「喀喀」个聲。空氣裡肚開始鼻著一種特殊个香氣，該係南片吹來燒暖个水氣，合核新生命黏時會暴芽个味瑞。

起頭係該兜毋打眼个鹽酸草<sup>4</sup>同臭頭香<sup>5</sup>，厥等有一屑畏事，對老樟樹腳下个地泥項同頭那探出來，嫩習習个葉吊緊金晫晫个露

水。老樟樹同這兜細生命低言細語，歡喜有厥等來共下迎接久見个春光。

初春个暗晡頭總係有一屑清冷，北風合核雨毛毋多知斯來到，雨點輕輕打在老樟樹个葉面，演奏出一首和按个夜曲。這兩水滋養燥渴个樹根，乜洗淨一身个塵灰。過無幾久，北風停，南風起，老樟樹看著燕隨風來，老朋友轉來哩啲。厥等在街路个簷脢下無閒濟借，對河壩脢銜泥整舊年个老竇，溜掠个身胚在藍藍个天頂畫出優美个弧線。厥等係春天个報訊者，帶來對生命个祝福。

老樟樹下漸漸鬧熱跣來咧。堵著燒暖个日，莊肚个老人家會在樹下行棋、打嘴鼓，耕種人會憑核樹身歇暍，放學个細姪會在厥四圍搞份家啦同园人尋。老樟樹企都澄澄精神十足，斯像高長大漢个巨人，佢用闊闊个樹影同厥等抵日頭，用輕輕个故氣同厥等送涼風。

對眼前个情景，老樟樹當感動，滿心歡喜。佢看遠遠，高山龍崙<sup>6</sup>、平洋坑壠，既經換撇灰色个舊衫，濛沙煙下係一片新色个大地。一陣風吹啊過來，老樟樹个樹桎跔核風搖啊搖，佢毋堵好嘎啄目睡，一曠目，幼嫩个新葉斯在手指項綻筍。

<sup>1</sup> 跂跂糾糾：音 gio+ gio+ giu` giu`；彎彎曲曲。

<sup>2</sup> 火蛇：音 fo` sha`；閃電。

<sup>3</sup> 暗雷：音 am` lui`；悶雷。

<sup>4</sup> 鹽酸草：音 rham` son` co^；酢漿草。

<sup>5</sup> 臭頭香：音 cu` teu` hiong+；香附子。

<sup>6</sup> 高山龍崙：音 go+ san+ liung` gien`；高山山脊。

編號 6 號

【拈著一隻青鸛<sup>1</sup>】范振新原作

舊年6月有一日下晝，一陣西北雨過後，佢行去雜貨店个路項，遠遠看著有一團毋知麼个東西，在淺淺个水窟肚蠕蠕動，佢遽遽行前去看真，原來係青鸛个鳥子。

佢胚想，驚怕係頭先分大雨打落來个？跔緊斯聽著佢「啾～啾～啾～」个叫聲，佢頭臥臥尋，看有厥爺哀無，嘎無尋著，又看該樹恁高，想愛同佢放上去也無法度。看佢冷都激激顫，驚怕佢會消撇，高不將帶轉屋家照顧。

該暗晡，佢無睡好，因為差毋多間兩三點鐘，斯愛䟽床飼鳥子食水。逐擺飼佢食水个時節，佢會在手指項滴一滴水拿到厥嘴脣，厥个舌嫵斯會西出來，同水舐入嘴肚。該央時，佢還毋會食飼料，佢愁會畜毋生，好得到第二日，佢斯會討食咧。

見擺肚屎枵个時節，厥个頸根會擱長長，嘴擘大大，還會盡命拈叫「啾啾，啾啾啾！」知佢愛食，佢遽遽同飼料摻兜水，用細湯匙灌畀食，一口、兩口、三口。鳥子逐擺都食毋多，當遽斯

會過枵，所以愛輒輒飼，食啊飽又過睡目咧，正經係食飽睡、睡飽食。

青鸛拈轉來畜無一個月，斯會飛咧。佢學飛个時節，會撞來撞去，一下撞著壁，一下撞著玻璃，斯像嬰兒學行路共樣，下把還會跌倒。有一擺佢又撞著咧，嘴擘擘像失魂个樣，怙怙企在鳥籠頂無停動，分佢已愁慮，檢查過後，好得無仰脣。斯恁泥跌斷腳骨顛倒勇，緊撞緊飛，緊飛緊撞，慢慢，佢斯越來越會飛咧，速度還當遽，有成時會在桌下穿啊過，一瞞目斯無看著咧。該載，佢聽得識自家个名，喊一聲斯會飛轉吾个手項。飛恁咧也會在吾巴掌嫵項歇睏，同頭那園在翼胛下睡目。

青鸛係城市當輒看著个鳥，毋過頭擺毋識去注意。係背尾畜這鳥了後正發現，在佢戴个屋脣，正經有已多。這下若係聽著有青鸛个叫聲，佢黏時斯知附近有青鸛。厥等个叫聲已有變化，逐種叫聲都有厥个意義同目的，佢聽厥个叫聲，大體斯揣得出佢想愛做麼个，比論講在該尋伴、分大鳥嚇著、撩佢起譴个叫聲，抑係當自然、當舒爽時節个叫聲，佢全聽得出。

在屋家，鳥籠門佢毋識關，隨在佢飛。這下逐日都會聽著佢當輕鬆个叫聲，斯像精靈在該唱歌个樣，「啾～」毋會停。

<sup>1</sup> 青鸛：音 ciang+ diˋ；綠繡眼。

編號 7 號

【梨情二三事】郭亭好原作

阿爹種有一大片个梨園，春天个時蓬白个梨花開去鬧借借，等到熱天橫山梨斯打去墜極墜枝。頭擺有梨「高接」个技術，梨農做下係種橫山梨。橫山梨大嫻粒皮又粗，想愛價數賣來好，包裝進前定著愛先洗過，所以在奈涼該下，長在會看著農家人一屋大細戴核棉紗手落，圍核一隻用水筴透水个大腳盆在該洗大梨。

緊工時節，吾等幾個細姪會分阿爹調轉去搵手。有一擺，表阿哥無認真洗梨淨顧搞水，結果一粒像嬰兒頭那恁大粒个梨，斯「嘖」聲下輪落地泥下，阿爹看著斯咄：「這南蛇、這南蛇！正經係生雞卵無、屙雞屎有。喊佢認真兜莫過搞咧，嘎連靚靚个梨也同佢輪落地泥下，實在還刷頭哪！」分人刻臭頭个表阿哥，嘴嘟鼻翹毋敢過搞。

阿奶看著毋盼得斯講：「好咧、好咧！大家較認真兜，下晝帶若等共下去果菜市场賣梨！」哇！聽著使得跣去賣梨，大家个精神斯來咧。尤其係表阿哥黏時斯企竄來，當遽手斯將米籬肚个大梨一粒、一粒緊拈落腳盆肚，包裝个時也特別認真。看吾等略

略較慢板兜，佢斯會像班長个樣緊逐吾等。因為佢知有好食个大麵同仙草冰在果菜市场等核吾等。

下晝時頭个果菜市场鬧熱濟借，買果子个販像鷹个樣，目珠利利在市场肚滿哪巡來巡去，看哪主个梨清甜好食；若係分佢看中意咧，斯用厥尖尖个觜，煞猛同你啄價數，剝去這兜農民血流血汀。毋過阿奶對自家種个梨，品質當有把握，若係梨販來開个價數爭差忒多，佢定著毋肯放，有中意个梨販，斯來來去去走幾下掖、膏撇歸點鐘，毋過阿奶共款恁堅持，盡尾該梨販無奈何，斯照阿奶開个價數來買貨。

吾等這幾個細姪看著梨賣撇咧，歡喜都緊跳，緊逐阿爹、阿奶：「遽遽啦、遽遽啦！吾等肚屎枵去憑背囊咧啦！」大麵一捧啊來，大家斯像餓殍个樣，毋驚燒、頭沉沉大口大口煞猛呷。看吾等食去汗流脈落，惜吾等个阿奶，總會過喊幾碗透心涼个仙草冰分吾等食。

該當時，傍核阿爹、阿奶个笑容，同叔伯兄弟共下搶兜个好味瑞，這下，哪搭位个知名大麵攤、仙草攤，也尋毋轉咧！

編號 8 號

【 拑鹽个西瓜 】黃美貞原作

佢久久都記得做細人該下个熱天，係對一粒西瓜起勢个。

該年佢小學三年生，阿姆在菜園箍一細垵地，講愛自家種幾頭西瓜來食，使得省一屑買果子个錢，又使得少食兜嚙嗒。第一擺看該頭細細个西瓜秧，葉皮毛絨絨，生當慢，逐日放學第一件事情斯係跔在厝脣頂，看佢有變較大一屑無。該年个熱天特別熱，日頭晒都地泥會難人。佢攞核細錫桶去淋水，還用舊遮同佢抵日頭，細心細意來照顧。

叔婆看著佢日日無閒濟借，笑緊講：「你種西瓜比佢還較認真哦！」種瓜來講，叔婆係老手咧，逐年熱天，佢總會擇兜自家種个西瓜來賣。佢用擔竿核核菜籃，一片放一粒西瓜，伙房人食飽晝在竹頭下坐寮个時節，佢斯切一嫌一嫌分大家嘗看看。該沙沙又甜甜个味瑞，餵著大家相賽注文，兩下半斯應淨淨咧。

佢種个西瓜總算在避暑該下開花、打子咧。該日，氣象報導風搓愛來个訊息，阿爸細心細義去田頂同西瓜摘落來，先放在簷脣下，佢拗核大西瓜毋肯放，緊講毋盼得破來食。食飽夜，一屋家人坐在禾埕打嘴鼓，阿姆拑一支利利个長刀，輕輕同西瓜破開

析，西瓜一路必開來。紅咚咚个西瓜，裡肚係烏金烏金排去齊齊个西瓜籽，脣口紅紅个西瓜汁，水液液<sup>1</sup>緊流。

佢等毋掣阿姆切，遽遽挖一垵塞到嘴空。甜係甜，毋過比起叔婆賣个，又試著還差一屑。阿姆笑緊搖頭，對灶下拿出一細碟鹽，「來，拑一屑鹽試看嚟。」雖然試著疑狐還係照緊做。無想著，咬一口，西瓜正經變甜咧。該年過後，屋家會種幾頭西瓜秧。雖然毋係粒粒好，有成時生來孬孬、有成時分蟲咬，拑兜鹽落去，該西瓜斯係童年記憶肚盡清甜个味瑞。

這下个西瓜大體對外地載來，外皮金頭、口感共樣，還有摺核合格个紅印，毋過佢總係試著少撇麼个東西，少撇該種自家種瓜時節个期待、日頭下汗流脈落个辛苦。因為正經个甘甜，係囡在平凡裡肚，愛一屑鹽，正食得出來。

<sup>1</sup> 水液液：音 shui<sup>ˊ</sup> rhe<sup>ˋ</sup> rhe<sup>ˋ</sup>；形容水多流溢貌。



編號 9 號

【比手機較有智慧】李淑娟原作

手機手機，人手一機！現代个學生使得講大體都係低頭族，火車頭、捷運站、公車項，無論坐核抑企核，耳機一掛手機一晝，網路世界花囉必駁，像毒品个樣恁錫人，頭沉沉汨在裡背毋想出來。

國中畢業該年，考試个成績還罔罔，阿爸送佢一支智慧型个手機，交代講愛利用佢好好學習。看緊該時行个色目，還有後背該粒缺角个蘋果、專業个三個鏡頭，佢連核幾日暢都毋使食飯，淨笑都會飽。

高中生活強調自主學習，無人掌核讀書交作業，想讀幾多內容、愛加強哪個科目都愛靠自家規劃，還過先生無恁嚴條，分線上遊戲錫著个佢一下失算，尋毋著學習个動力、讀書个目標，作業層三砒四無寫、無做、無交。講乜奇怪，較新个流行歌曲聽幾遍佢斯會唱，較難个遊戲搞過一擺斯當熟絡，毋過聽先生講話斯像鴨聽雷共樣，上課啄目睡、坐核緊領頭。

看佢逐日掌手機，一離開手機斯訥訥暴暴緊發譴，長在半夜轉點咧毋睡目，偷偷囡囡揞緊被骨搞到臨天光，阿姆心焦馬亂唸

講：「過搞落去，目珠會青暝哦！」毋知分醒个佢總係左片耳公入，右片耳公出，還恁著奸計——詐屙屎囡入便所搞，正經係老古人講个：「懶人無屙無好奈！」一暗晡愛屙兩三到，一到愛屙成點鐘，無屙到阿姆來碰<sup>1</sup>門絕對毋出來。

直直愛到考試个前一禮拜正開始愁，坐在書桌前掀開新衝衝个課本，噯毋知愛對哪開始讀，牙研目皺拿緊原子筆，頭那疾去硬硬會噉撇。過無兩日个好光景，想拚个決心像風恁輕，讀書个計畫比紙較薄，數學哪有遊戲恁生趣，英文廣播哪有音樂恁好聽，懊躁个佢又開始畫手機尋快樂咧。用腳膝頭想乜知，學期結束个時節，幾下科目無及格，化學連補考个機會都無，唉！實在見笑。

阿奶講過：「跌倒一擺，總毋好過跌第二擺。」這下佢正知，人愛比手機較有智慧，同佢用做搵手學習个承勞，毋係托核變爛死時間个主人。好好管理時間，規劃學習个節奏，尋出自家个方向，認真讀書人生正毋會輸。

<sup>1</sup> 碰：音 pong+；捶擊。

編號 10 號

【行出去，正有風景】范振新原作

在臺灣，有人講人生在世有三件事情定著愛做：跋玉山，泳渡日月潭，還有騎鐵馬環島。雖然講，這兜全無恁該，愛堅耐還愛有體力正奈得何。也有人講，該恁恅个東西，何麼死苦，食飽忒閒係無？毋過，還係有緊來緊多人相賽去自我挑戰。阿宏也共樣，將這三件事，準做厥人生个目標。

從細，阿宏厥爸總會講：「做人做事愛有膽，毋識做過个斯愛去試，無試仰會知！」厥爸會恁泥講，斯係希望阿宏愛培養勇敢面對艱難个自信，斯像人講个：「敢去斯一擔樵，毋敢去斯屋家愁。」所以，厥爸當鼓勵佢趕後生身體較砸个時節，去挑戰人生。受著厥爸个影響，阿宏 18 歲生日該日，斯騎核鐵馬，單人獨馬走去環島。

出發該日一色青天，阿宏打早斯著一身運動个衫褲，騎核屋家該臺既經迴臺灣兩輪个鐵馬準備出發。無毋著，這臺鐵馬雖然毋係當高級，毋過已耐戰，厥兩個阿哥都係騎這臺鐵馬去環島个，恁多年來毋識壞。出發前，斯單淨加安一個車架放包袱，過同輪嘮風斯出門。無特別安排路線，也無按算一日愛騎幾遠，淨

這擺環島無先抽牽規劃，正經係「時到時當，無米煮番薯湯」。有幾日斷烏咧還旨決定愛在哪戴，臨時及急正上網尋。死皺咧！該日騎到臺東，堵好堵著奈日，又無先注文，問幾下間旅社嘎全無間房，高不將走去海胥个沙灘睡。雖然沙灘無眠床恁素絲，毋過，胥項無別儕，恬靜恬靜，淨聽得著海浪个聲一陣一陣，四圍暗摸叮咚，天頂个星一瞞一瞞。這暗晡，阿宏斯在這滿天星光个美景當中睡撇咧。

第二日天矇光，阿宏坐在沙灘，遠遠看著該火紅色个大卵黃對海竇鑽啊出來，緊來緊大、緊來緊光。看著這天闊地闊个光景，阿宏心肝肚想：有兜路，無行過，你毋知風景在哪；有兜事情，無親身去做，你永久毋知自家使得行幾遠。